

成實論卷第十二

舍二

訶梨跋摩造

姚秦三藏鳩摩羅什譯

雜煩惱品第一百三十六

問曰經中說三漏欲漏有漏無明漏何者是

答曰欲界中除無明餘一切煩惱名爲欲漏

色無色界有漏亦如^{舍二}是三界無明名無明漏

問曰諸漏云何增長答曰以下中上法故漸

次增長又得色等勝緣故諸漏增長問曰是

三漏云何說爲七漏答曰實漏有二種見諦

斷是諸漏根本思惟斷是諸漏果五助漏因

緣合爲七即此煩惱佛隨義故說三漏四流

四縛四取四結等問曰四流欲流有流見流

無明流何者是答曰除見及無明餘欲界一

切煩惱是名欲流色無色界有流亦如是諸

見名見流無明名無明流問曰流中何故別

說見流漏中不說耶答曰外道多爲見所漂

流是故流中別說以能漂沒故名爲流能繫

三有故名爲縛問曰四取欲取見取戒取我

語取何者是答曰無我故但取是語名我語

取若人有我見即生二邊是我若常若無常

若定言無常則取五欲以無後世故深著現

在樂若定言常鈍根者則取持戒望後世樂

小利根者作如是念若神是常則苦樂不變

則無罪福故起邪見如是但因我語故生四

取問曰四結貪嫉身結瞋恚身結戒取身結

貪著是實取身結何者是答曰貪嫉他物他

人不與則生瞋心以鞭杖等是在家人鬪諍

根本亦名隨樂邊若人持戒欲以此戒而得

清淨即謂是實餘妄語是見則隨是出家人

諍訟根本亦名隨苦邊五陰名身是四結要
須身口成故名爲身結又有人言是四法能
繫縛生死故名爲結問曰五蓋貪欲瞋恚睡
眠掉悔疑是事云何答曰人貪著諸欲故瞋
恚隨逐如經中說從愛生恚及嫉妬等煩惱
鞭杖等惡業皆以貪欲故生是人身心爲貪
恚所壞多事疲勞則欲睡眠是人睡眠小息
貪恚還來散亂其心不得禪定心隨外緣故
生掉戲不淨業人心常憂悔以散心悔心故
心常生疑有解脫不如王子語阿夷羅曰沙
彌問曰何故名蓋答曰貪欲瞋恚能覆戒品
掉悔能覆定品睡眠能覆慧品有人爲除此
蓋故說是善是不善是人於中生疑爲有爲
無此疑成故能覆三品是五蓋三法力強故
獨名爲蓋二蓋力薄故二法合成又此二蓋

生因緣俱是故合說睡眠因緣五法謂單致
利不喜頻申食不調心退沒掉悔因緣四法
謂親里覺國土覺不死覺憶念先所戲樂言
笑是名生因藥亦同故睡眠以慧爲藥掉悔
以定爲藥覆亦同故二合爲蓋此五法或是
蓋或非蓋欲界繫不善名爲蓋餘不名蓋五
下分結貪欲瞋恚戒取以墮下故名爲下分
如持牛戒成則爲牛不成則入地獄疑障離
欲身見是四根本是名爲五又以貪恚故不
出欲界身見不出我心戒取不出下法疑不
出凡夫又貪欲瞋恚故不過欲界若過還爲
所牽餘三不過凡夫故名下分五上分者掉
戲壞禪定故心不寂滅是掉戲隨取相故憍
慢生是取相心從無明生故有色染無色染
此五結學人以之爲上行故名上分是五結

於學人心中說不爲凡夫問曰掉戲何故於色無色界說名爲結欲界中不說耶答曰彼中無麤煩惱故掉戲明了又此掉戲於壞定有力故說爲結斷此上分則得解脫有人色無色中生解脫想爲遮此故說有上結五慳者住處慳家慳施慳稱讚慳法慳住處慳者獨我住此不用餘人家慳者獨我出入此家不用餘人設有餘人我於中勝施慳者我於此中獨得布施勿與餘人設有餘人勿令過我稱讚慳者獨稱讚我勿稱讚餘人設讚餘人亦勿令勝我法慳者獨我知十二部經義又知深義祕而不說問曰是五慳有何等過答曰是住處等多人共有是人旣捨自家於共有中更生慳悋是弊煩惱又此人於解脫中終無有分所以者何是人於共有法尚不

能捨何況能捨自五陰耶又此人墮餓鬼等諸惡處生又此人以利養覆心則生憍慢輕餘善人故墮地獄又壞他施故若得人身則爲貧窮又以慳心斷施者功德受者施物故得重罪若慳悋法得盲等罪所謂生盲及多怨中生不得自在退失聖胎三世十方諸佛怨賊往來生死常爲愚癡善人遠離離善人故無惡不起惡名三種惡惡大惡惡中惡惡名殺盜等大惡名自殺亦教人殺自慳亦教人慳惡中惡名自悋法亦教人悋法是人悋法令多人墮惡亦是滅佛法道如經中說住處慳有五過未來善比丘不欲令來已來則頻感不喜念欲令去藏僧施物於僧施物生我所心家慳有五過以貪著家故則與白衣同其憂喜斷白衣爲福受者得施斷此二故

即生此家爲廁中鬼施慳有五過常乏資生
破二人利訾毀善人心常憂惱稱讚慳有五
過聞讚餘人心常擾濁於百千世常無淨心
呵毀善人自高已身卑下他人常被惡名又
一切慳總有斯過謂積聚多物畏怖大衆多
人增惡心常擾濁身常孤梵生下賤家如是
無量是五慳過五心栽疑佛疑法疑戒疑教
化若有比丘爲佛及諸大人所稱讚者是人
則以惡口讒刺是名爲五疑佛者作如是念
佛爲大富蘭那等爲大耶疑法者佛法爲勝
韋陀等爲勝耶疑戒者佛所說戒爲勝鷄狗
等戒爲勝耶疑教化者阿那波那等教法爲
能至泥洹不讒刺者以瞋恚心無畏敬心侵
惱善人是人以此五法敗壞其心不任種諸
善根故名心栽問曰是人何故於佛等生疑

會二

五

答曰是人不能多聞是故生疑若多聞者疑
則薄少又此人愚癡無智不知分別佛法異
法是故生疑又此人於法不能得味是故生
疑又不聞不讀韋陀等經聞人稱讚故生貴
心又是人世世邪疑偏多心常濁故於佛等
疑如佛侍者蘇那利多羅又此人與多邪見
人共同事業故令生疑又此人讀誦韋陀和
伽羅那等邪見經故壞正智慧是故生疑又
此人於諸法義喜生邪念不能得造經者意
是故生疑又此人始終不能得自利功德以
此緣故於佛等生疑五心縛若人不離身欲
故貪著身不離五欲貪著欲又與在家出家
人和合於聖語義中心不喜樂得少利事自
以爲足是中四縛因貪欲起若人不離內身
欲故於外色等欲中生著是故樂與兩衆和

合以樂憤鬧故於聖語義示寂滅法中心不喜樂是故於持戒多聞及禪定等少利事中自以爲足以貪著此少利事故忘失大利智者不應貪著小事以妨大利是人若離八難得人身難故應一心勤加精進又凡夫法不可信也若離此具足因緣或有餘緣終不復能得入聖道又不貪小利則能得出家果報亦死時不悔亦能自利利他又此人於功德中尚不貪著何況惡法故名正行又凡夫過咎所不能染問曰何謂凡夫過耶答曰經中說凡夫應二十種自折伏心應作是念我但形服異俗空無所得我當以不善而死當墮大怖畏海當至畏處不知無畏處亦不知道不得禪定數受身苦難離八難怨賊常隨諸道皆開未脫惡道常爲無量諸見所縛於五

舍二

六

逆罪未能防制無始生死未有邊際不作不得罪福善惡不得相代不爲善法終無安隱所作善惡終不忘失我當以不調至死是二十法所不能汙又所應作者是人已作故心不悔若貪著者則不能成在家及出家法是故不應貪著小利

七使問曰諸煩惱何故名使答曰生死相續中常隨衆生故名爲使猶如乳母常隨小兒如瘡病未脫如負債日息如鼠毒未除如熱鐵黑相如穀子芽如自要奴券如斷事證人如智慧漸積如業常集如炎相續如是次第相續增長故名爲使問曰是使爲心相應爲不相應答曰心相應所以者何所說貪等使相是諸使相與喜相應若喜心不相應是事不然是喜若在樂受中名爲貪使又貪名染

著心不相應中無染著義故知諸使與心相應問曰不然諸使非心相應所以者何經中說小兒婬心尚無況能婬欲亦為欲使所使又說不思不分別亦有緣識住故又經中說身見斷時諸使俱斷又聖道煩惱不得一時是故聖道生心不相應使斷若不爾者聖道何所斷耶又若無心不相應使凡夫學人若在善心無記心時便應是阿羅漢又使為纏因從使生纏得纏使則熾盛故知諸使非心相應又若人在善無記心亦名有使若無心不相應使者何故名有使耶故知諸使非心相應答曰不然汝言小兒無欲亦有貪使是事不然小兒未得除貪藥故貪欲未斷故為貪使使如鬼病人雖不發時亦名鬼病人所以者何以其未得呪術藥草斷病法故亦如

四日瘧病雖二日不發亦名瘧病人亦如鼠毒未瘥除故雷聲則發如是於何心中未得除使藥故名為不斷餘問亦已總答汝言不思不分別亦有緣識住故者亦以未斷使故汝言身見與使俱斷者汝以纏為心相應未生時亦斷使亦如是雖聖道時無亦名為斷以得相違法故汝言道與煩惱不一時者亦以未斷故說言有汝言凡夫學人若在善無記心應是阿羅漢者阿羅漢已斷此人未斷故如人不受斷肉法雖不食肉不名斷肉又有無明邪念邪思惟等故所未斷煩惱則生阿羅漢無此因故不同餘人又汝言得纏使則熾盛是事不然諸煩惱以下中上法故熾盛非得纏故汝言人在善無記心名有使者亦以未斷故名有使以是等緣故知貪等諸

使非不相應八邪道邪見乃至邪定以不如實知顛倒見故名爲邪見乃至邪定問曰正命邪命不離身口業何故別說答曰邪命出家人所難斷是故別說邪命者以諂誑等五法能得利養故曰邪命取要言之諸出家人所不應作資生之業謂王使販賣治病等業及所不應取衆生錢穀等若取皆名邪命又毗尼所制以此自活皆名邪命如經中說優婆塞不應五種販賣問曰何以濟命答曰如法乞求以此活命不應邪命所以者何以心不淨毀壞善法不任修道故又行道者應作是念入佛法中爲行道故不爲活命是故樂善法者應行淨命又比丘應住比丘法中若行邪命非比丘法

九結品第一百三十七

愛等九結問曰何故於諸見中別說二取答曰戒取難免離故猶如浮木入洄漩中難可得出是人亦爾作是念我以是持戒當生天上爲此故受投淵赴火自墜高等種種諸苦又世間人於戒取中不見其過故佛說爲結又依此戒取能捨八直聖道又此非正道非清淨道名隨苦邊又戒取是出家人縛諸欲是在家人縛又戒取者雖復種種行出家法空無所得又戒取者今不得樂後受大苦如持牛戒成則爲牛敗則墮地獄又因此戒取能謗正道及行正道者又戒取是諸外道起憍慢處作如是念我以是法能勝餘人又以戒取故九十六種有差別法又戒取是麤見故多衆生行智慧道微妙難見世間不知行之得利又此見能牽人心故愚癡者多行此

法又此名重惡見以逆正道行非道故見取者所以貪著邪法不能捨離是見取力又以見取力故諸結堅固問曰帝釋問經中何故但說天人有慳嫉二結答曰是二煩惱最是鄙獎所以者何見他衆生飢渴苦惱以慳心故不能矜濟見從他得亦生嫉妬心懷惱熱以是因緣墮貧賤醜陋無威德處又釋提桓因是二結偏多數來惱心故佛爲說又此二結是重罪因緣所以者何因此二結起重惡業故又三毒中貪恚能起重罪貪恚盛故起此二結又此二結能惱男女又難捨離所以者何若深修善心乃能求斷嫉妬深修布施然後盡斷慳心以不見業報而能捨所重物是爲甚難如人見子得勝已事心尚難喜況於怨賊以此二結依憎愛故深難除斷以此

業緣故佛獨說

雜問品第一百三十八

論者言一切煩惱多十使所攝是故當因十使而造論十使者貪恚慢無明疑及五見問曰十煩惱大地法所謂不信懈怠妄憶散心無明邪方便邪念邪解戲掉放逸是法常與一切煩惱心俱此事云何答曰先已破相應但心法一一生是故不然又此非道理何以知之或有不善心與不善信俱或有不善心而無信精進等亦如是故知非一切煩惱心中有此十法又汝說睡掉在一切煩惱心中是亦不然若心迷沒爾時應有睡不應在戲掉心中有如是等過問曰欲界中具十煩惱色無色界除瞋餘殘一切是事云何答曰彼中亦有嫉妬等何以知之經中說有梵王語

諸梵言汝等勿詣瞿曇沙門汝但住此自得
盡老死邊是名嫉妬有嫉妬故亦應有瞋又
經說梵王提一比丘手牽令出衆謂言比丘
我亦不知四大何處無餘盡滅如是以諂曲
心誑諸梵衆是名諂曲若言我是尊貴造萬
物者是名僞逸如是等彼間亦有如是等惡
煩惱故當知亦有不善有論師言若貪父母
及上阿闍梨等是名善貪貪他物等名不
善貪若不爲損益他人名無記貪瞋不善法
及惡知識等是名善瞋若瞋善法及瞋衆生
名不善瞋若瞋非衆生物名無記瞋若依慢
斷慢是名善慢輕他衆生名不善慢無明等
亦如是又論師言若善不名煩惱問曰欲界
身見說名無記所以者何若身見是不善一
切凡夫皆生我心不可令盡墮地獄故說無

會二

十一

記是事云何答曰身見是一切煩惱根本云
何名無記耶又此人墮爲他人說有神我爾
時云何當名無記邊見亦如是問曰若轉人
邪見令墮疑中此人不善耶答曰此人非
是不善所以者何寧墮疑中不入邪定問曰
有人言欲界繫煩惱一切能使欲有相續色
無色界繫亦如是是事云何答曰但愛能令
諸有相續以先喜後生故又說愛爲苦集亦
說愛樂飲食貪欲等故隨處受生邪見等中
無如是義經中雖說慢因緣生亦先慢後愛
故生瞋亦如是故知皆以愛故諸有相續問
曰諸煩惱中幾見諦斷幾思惟斷答曰貪恚
慢無明二種見諦斷思惟斷餘六但見諦斷
問曰學人亦有我心故知不示相身見分學
人未斷答曰是慢非見見名示相問曰有人

言慳嫉妬悔諂曲等但思惟斷是事云何答曰是皆二種亦見諦斷亦思惟斷何以知之如尼延子等見佛弟子得供養故生嫉妬心是嫉妬見道則滅故知見諦所斷有人先於佛弟子慳惜不施得見道故便能施與是慳則見諦斷如蘇那剎多羅等悔亦見諦斷如須陀洹墮地獄等因緣及第八世受身諂曲等亦見諦斷問曰諸煩惱幾見苦斷幾見集滅道段幾思惟斷答曰先說見諦所斷六使四種見苦段見集滅道斷餘四使五種問曰身見邊見但見苦斷戒取二種見苦見道斷是事云何答曰諸煩惱實見滅諦時斷是故身見等不應但見苦斷又身見於四諦中謬五陰無常從因緣生我非無常不從因生五陰有滅而我無滅道與我見相違法是故身

卷二

十二

見四種所斷邊見亦四種斷所以者何行者見苦從集生則滅斷見見由道得滅則滅常見戒取亦四種有因有果是故見苦時知戒是苦不以此得淨是見苦斷知戒是苦因不以此得淨是見集斷以邪見謗泥洹謂以此見得淨是見滅斷以此謗道是見道斷如見取依邪見故四種戒取亦應如是問曰若爾者不名九十八使答曰諸使隨地斷不隨界故不限九十八也問曰貪慢及除邪見餘四見皆三根相應除苦根憂根瞋恚亦三根相應除樂根喜根無明五根相應邪見疑四根相應除苦根瞋覆罪慳嫉但憂根相應是事云何答曰先已破無相應故後當說五識中無煩惱故又汝法中貪喜根相應慳則不爾是無因緣慳是貪分故如是憍慢不與憂根

相應亦無因緣故知汝等所說皆自憶想分別問曰有人言見苦所斷五見疑及貪恚慢不相應無明及集諦所斷邪見見取疑及貪恚慢不相應無明是名徧使餘非徧此事云何答曰一切是徧所以者何一切皆共相因相緣故又於已邪見中生貪所謂無苦乃至無道貪著此見而以自高若聞說苦則生憎恚又此貪能緣滅諦瞋亦能憎恚泥洹亦以泥洹生自高心道亦如是當知餘使亦有能徧又欲界繫煩惱能緣色界如以貪喜樂以瞋憎惡以彼法自高亦以之爲勝非欲界也如欲界煩惱能緣色界色界見等煩惱亦能緣欲界果無色界亦如是又此煩惱皆能總相別相所以者何貪亦能總相染四天下又長爪經說一切忍是貪一切不忍是瞋一切

不忍是貪一切忍是瞋亦以此煩惱自高是煩惱皆能起身口業所以者何經中說生如是見說如是事謂有神等又此一切煩惱皆在第六識中五識中無所以者何想行第六識故一切煩惱皆從想生若不爾身見等亦應在五識中所以者何以眼見色謂我能見疑慢等亦如是問曰經中說六愛衆云何言五識中無煩惱耶答曰如六意行皆在意識中但以眼等開導故名六意行是事亦爾又意識中所有分別因緣五識中無故知五識中無煩惱也

斷過品第一百三十九

問曰有人言諸煩惱九種下中上下下中下上中下中中上上下上中上上智亦九種是煩惱先斷上上後斷下下以下下智斷

上上煩惱乃至以上上智斷下下煩惱是事
云何答曰以無量心斷諸煩惱所以者何經
中佛說譬如巧匠手執斧柯眼見指處雖不
能分別日日所盡若干分數但見盡已乃能
知其盡比丘亦爾修行道時雖不分別知今
日所盡若干諸漏舍二昨日所盡若干分數但盡
已乃知漏盡故知以無量智盡諸煩惱非八
非九問曰依止何定斷何煩惱答曰因七依
處能斷煩惱如經中佛說因初禪漏盡乃至
因無所有處漏盡又離此七依亦能盡漏如
須尸摩經中說離七依處亦得漏盡故知依
欲界定亦得盡漏問曰見諦所斷煩惱不應
依無色定斷以此行者壞色相故答曰是事
先答謂無色定能緣於色問曰爲先從初禪
次第離欲至二禪等爲一時耶答曰應當次

第以離初禪欲生二禪等故問曰欲界中亦
有次第耶答曰諸煩惱念念滅故亦應次第
又如炎摩天抱則成欲兜率陀天執手成欲
化樂天以口說成欲他化自在天相視成欲
當知欲界煩惱亦漸次盡有人言以福德因
緣於彼中生不以斷煩惱故以所欲妙故成
有差別又根鈍故抱乃成欲根轉利故視則
成欲問曰有人言思惟所斷煩惱漸次斷先
欲界繫後色無色界繫見諦所斷則一時斷
是事云何答曰隨諦所斷而實一切煩惱見
滅諦斷是事舍二先說所謂見諦所斷身見等煩
惱皆見滅諦斷從暖法來以無常等行觀五
陰相始斷煩惱見滅乃盡問曰觀欲界繫苦
能斷欲界結集亦如是如欲界乃至非想非
非想處亦如是觀欲界滅能斷三界結道亦

如是是事云何答曰滅智能斷煩惱是故汝說不然問曰經中說觀五陰無常等故得須陀洹果乃至阿羅漢果汝云何言但觀滅諦斷煩惱耶答曰是觀五陰智生滅合觀故能斷結使如經中說比丘觀是色是色集是色滅又當說見法識法則煩惱斷可知見滅諦故諸煩惱盡又五陰是苦於中生諸煩惱若見五陰滅以為寂滅安隱如是則苦想具足故知見諸陰滅則煩惱盡如說因諸法無體性依一捨心斷無體性即是滅若行者見色無體性乃至識無體性則深得離又三解脫門皆緣泥洹以此解脫門能斷煩惱無餘方便故知但無為緣道能斷煩惱是故汝所說斷煩惱法是事不然論者言諸煩惱有如是等無量分別門以求解脫者應當知所以者

何以知是縛過故得解脫如人識怨故能遠離如知險道故能得避煩惱亦如是又煩惱縛甚為微細過於毗摩質多羅阿脩羅王縛乃至有頂衆生尚為煩惱縛是故應知其過又衆生乃至有頂猶還退墮皆以不能見知煩惱過故又不斷結故生增上慢自謂已斷後則疑悔是故應知諸煩惱過勿為所誑又若衆生捨離淨妙泥洹之樂反貪鄙弊欲樂有樂皆是諸煩惱過若斷煩惱則得大利故應知見諸煩惱過又障解脫法所謂煩惱若不斷煩惱終無解脫因緣所以者何諸煩惱是身因緣隨煩惱有身隨身有苦是故欲求離苦者應勤精進斷諸煩惱

明因品第一百四十

問曰煩惱為身因緣是事應明所以者何有

諸外道不信此事或言是身無因無緣猶如草木自然而生或言萬物是大自然在等諸天所生或言萬物從世性生或言微塵和合故生說如是等是故應明答曰從業有身是事先成是業從煩惱生故以煩惱為身因緣問曰云何知因煩惱有業答曰隨假名心名為無明假名心者能集諸業故知煩惱因緣有業又阿羅漢諸業不集不成故知諸業由煩惱成如經中佛說若人得明捨離無明是人能起罪業福業無動業不不也世尊又無無漏業故知但隨假名者能起諸業無漏心不緣假名故不起業也又學人無行如經說學人還而不行滅而不作作相是行行名為業又無漏心非行相故無無漏業是故一切諸受身業皆因煩惱生又斷煩惱者不復受生

舍二

十七

故知有身皆因煩惱問曰一切衆生皆以無煩惱生後時乃起如人生時無齒其後乃生答曰不然有煩惱者隨所有相謂啼哭等生時現有故知皆與煩惱共生又現見衆生多生廁等中不生磐石等中當知貪著香味等故於是中生故知由煩惱生問曰地獄等中不應得生所以者何無人貪樂地獄等故答曰衆生以癡力故顛倒心生將命終時遙見地獄謂是華池以貪著故則於中生如經中說若入淫關中死欲得寬處於鳥中生若渴死者生為水蟲若凍死者生熱地獄中熱渴死者生寒水地獄中若貪著姪欲生鳥雀中若貪飲食則生為死屍中蟲又因所貪著故造諸惡諸惡因緣強受果報又貪著身故諸業能生果報所以者何貪著已身愚癡力故

憍慢等諸煩惱生從此能集成業以業力故
生諸道中間曰若以煩惱因緣有身斷煩惱
者五陰不應復得相續答曰是身本由煩惱
故生煩惱雖盡以勢力故身猶不斷如以杖
轉輪雖暫廢杖轉猶不止問曰若以先業煩
惱勢故有身斷煩惱者以先業煩惱勢故亦
應受身答曰要以取相故識能住是人先業
勢盡今善修無相解脫門故不受後身又如
熱石上諸種不生如是以智慧火熱諸識處
則識種不生後相續斷又諸行因緣不具足
故不復相續如經中佛說識爲種子業行爲
田貪愛爲水無明覆蔽以此因緣則受後身
阿羅漢是緣不具故無後身當知煩惱因緣
受生又無煩惱者有知苦等心今受生者不
見有此等心故知無煩惱者不能受生問曰

舍三

十八

須陀洹等有苦等心而生時亦不見有答曰
諸阿羅漢智慧力強一切煩惱不能勝故將
命終時能障受生須陀洹等智力不爾故不
應爲喻又汝說如齒後漸漸生煩惱亦爾是
事不然所以者何諸阿羅漢無漏智慧燒煩
惱故不應得生如焦種子不能復生又現見
今世從煩惱生身如從貪欲身色變異瞋恚
亦爾故知後世五陰亦從煩惱生問曰亦見
從飲食等因緣有五陰生而不名飲食爲受
身因緣答曰飲食假心能生色等煩惱不爾
更無所假而生色等故知煩惱爲身因緣又
現見鳥雀等多欲毒蛇等多瞋瞎等多癡當
知此諸衆生必當先修集此婬欲等諸煩惱
故於是中生問曰生處法爾非先修集煩惱
因緣答曰若爾則婬欲等無因是事不可當

知從先修集因緣故有又貪恚等煩惱熾盛則爲殺等諸罪以此罪故現受鞭杖繫縛等苦煩惱若薄則得持戒修善等利因此戒善現得名聞利養等樂如現世衰利皆因煩惱故知來世亦當如是問曰若因煩惱有身則會二斷生死往來所以者何以煩惱盛故墮惡道十九中既受罪身煩惱更增永無脫因如是不應復得生善處若受福身爲福轉增則亦不應復生惡處如是則無生死往來答曰是人雖墮惡處或得善心雖生善處或起惡心是故生死往來不斷又隨貪等煩惱減少隨生好處隨貪等多隨生惡處如豬犬等隨滅煩惱生善處者如以煩惱薄故能行布施持戒等福生六欲天斷婬欲故得勝禪樂斷色染故得勝定樂一切結盡則得無比泥洹樂故知此

身因煩惱有又現見衆生樂弊國土及諸惡人弊止住處皆由貪著故知生死中衆生所住亦由貪著如蛾貪明色故爲燈所焚是貪著不從智生所以者何此蛾不知火是苦觸故投其中如是衆生墜後身苦皆以無明因緣貪愛故生如魚吞鈎麀鹿逐聲皆以貪著故致死又如人以貪著故遠到異方而不能反當知皆以煩惱故生又如樹根不拔其樹猶生如是貪根不拔苦樹常在如佛說樹根不拔雖斷猶生貪使不拔數數受苦又是身不淨無常苦空無我自非無明何有智者貪受此衰苦猶如盲人可以垢衣誑爲寶飾如是爲無明所盲則能受多過患不淨五陰又以我心故受身雖苦而不能捨若無我心則能遠離如舍利弗說清淨持戒得道者死時

歡喜猶破毒器故知煩惱因緣有身又有以無智故貪著此身如以晝篋盛滿不淨隨未開時則可愛樂開則臭穢又如毒蛇滿闇室中燈未照時則生樂著見則捨離衆生亦爾隨有無明則樂世間若生明時心則厭離如是貪愛為身根本所以者何以貪愛故求求有二種欲求有求求現在諸欲是名欲求更求後身是名有求故知貪愛現在諸欲是名欲求更求後身是名有求故知貪愛是身之本又若著五陰則生身見謂言是我名我語取因此取故生餘三取取因緣有有因緣生當知煩惱是身根本又是身皆苦於此苦身生樂想倒以此樂倒則生倒愛以此倒愛能受後身故知貪愛因緣有身又此身以食因緣故住著搏食故不過欲界如業品中說貪

香味故廁等中生以著觸故胞胎中生著溫涼觸故卵生濕生俱不過欲界因界觸生三種受故說觸因緣受意思食亦如是發後身願我當作此無見知識為食愛本能致後身如是四食皆由貪愛一切衆生皆以食存故知愛因緣生又四生卵生胎生濕生化生以愛婬欲故卵生胎生貪香味等故受濕生隨其所愛故起殷重業則愛化生故知四生差別皆由貪愛又四種受身有能自殺他不能殺如是等四皆以貪愛差別故有故知貪愛因緣有身又四識處隨色識住依色緣色以喜為潤受想行亦如是而不說識是識處以識時無煩惱故故知煩惱因緣有身又十二因緣皆由無明所以者何隨假名心名為無明因此無明起福行罪行及不動行欲安樂

衆生是名福行苦惱衆生是名罪行攝心慈悲等名爲不動行隨此諸業識住後身依識生名色六入觸受此四是先世業煩惱果報復因此受生愛取有是業煩惱能生後世生老死等如是十二有分相續皆以無明爲本故知煩惱因緣有身又生死無始何以知之經中說從業因緣有眼等根因愛有業因無明有愛無明因邪憶念邪憶念還因眼綠色從癡故生故知生死輪轉無始若說因自在天等則非無始是事不可故知煩惱因緣有身又滅盡煩惱則得解脫又衆生身種種雜類若因自在等則不應雜以煩惱業有種種故身亦非一又二十二根因六根生六識是中有男女根是諸法相續不斷故名爲命是命以何爲根所謂業也是業因於煩惱煩惱

依受故以五受爲根如是展轉生死相續依信等根能斷相續如是二十二根往來生死故知皆以煩惱有身又求解脫者生戒定慧解脫解脫知見品此何所用皆爲滅諸煩惱知者見其利故依此諸品故知煩惱因緣有身又諸煩惱次第滅盡斷三結得須陀洹果貪欲等薄得斯陀含果欲界結盡得阿那含果諸禪定中亦如是次第一切都盡得阿羅漢果如是隨諸煩惱次第滅故身亦漸滅若因自在天等則不應漸滅故知煩惱因緣有身又貪等煩惱諸善人皆求斷滅三必當見貪等因緣今世後世得衰惱事是故求斷若不爾則不求斷若人說身因自在等是人亦求斷貪欲等故知貪欲等因緣有身又智者知以智慧而得解脫可知以無智故縛故知煩

